

CONVENIO DE COLABORACION ENTRE O INSTITUTO ENERXÉTICO DE GALICIA (INEGA) E A FUNDACIÓN CENTRO TECNOLÓXICO DE EFICIENCIA E SOSTENIBILIDADE ENERXÉTICA (ENERGYLAB), PARA A ELABORACIÓN DA DOCUMENTACIÓN TÉCNICA NECESARIA PARA LEVAR A CABO AS LICITACIÓNS PÚBLICAS DO PROXECTO DO ECOBARRIO DE A PONTE NO CONCELLO DE OURENSE.

En Santiago de Compostela, a 1 de agosto de 2018

R E U N I D O S

Dunha parte, [REDACTED], en nome e representación do Instituto Enerxético de Galicia en adiante Inega, con domicilio na rúa Avelino Pousa Antelo, nº 5 (15703 Santiago de Compostela) e na súa calidade de director deste, cargo para o que foi nomeado polo Decreto 235/2012, do 5 de decembro, facendo uso das facultades do seu cargo e das que lle foron conferidas en virtude das atribucións que lle confire a Resolución do 10 de marzo de 2017 pola que se delegan competencias atribuídas á persoa titular da Presidencia da axencia Inega (DOG núm. 60, do 27 de marzo).

Doutra parte, [REDACTED], en nome e representación da Fundación Centro Tecnolóxico de Eficiencia e Sostenibilidade Enerxética en adiante EnergyLab, con domicilio en Edificio CITE XVI – Fonte das Abelleiras s/n, 36310 Vigo, na súa calidade de Director Xeral da Fundación.

As partes, recoñécense mutuamente, na representación que ostentan, suficiente capacidade legal para a formalización do presente Convenio de Colaboración,

E X P O Ñ E N

Primeiro.- Que o Estatuto de Autonomía de Galicia atribúe á Comunidade Autónoma a competencia en materia enerxética segundo o disposto no seu artigo 28.3. O Inega é unha axencia pública cuxo obxecto é a execución da política autonómica en materia de enerxía e entre os seus fins figuran “o fomento, impulso e realización de iniciativas e programas de actuación para a investigación, o estudo e o apoio das actuacións de coñecemento, desenvolvemento e aplicación das tecnoloxías enerxéticas, incluídas as renovables, a mellora do aforro e a eficiencia enerxética, o fomento do uso racional das enerxías e, en xeral, a óptima xestión dos recursos enerxéticos dos distintos sectores económicos de Galicia, así como a participación na xestión e prestación, se é o caso, de servizos noutros

campos sinérxicos, de acordo coas directrices do goberno no ámbito das súas competencias”.

Que para o exercicio axeitado das súas funcións, o Inega pode establecer convenios e contratos con institucións públicas ou privadas, así como colaborar con outras Administracións para favorecer a adopción de medidas de aforro, de racionalización na produción, distribución e subministración de enerxía (art. 5 da Lei 3/1999).

Segundo.- EnegyLab é unha Fundación de carácter privado e sen ánimo de lucro inscrita no Rexistro de Fundacións de Interese Galego co número 2008/24. Tendo como misión desenvolver e difundir tecnoloxías, produtos e hábitos de consumo que optimicen a eficiencia e a sustentabilidade enerxética, nos sectores industrial, terciario, transporte e na sociedade en xeral.

Como actividades fundacionais enumeradas nos seus estatutos encontrese a colaboración ca administración en temas relacionados con aforro e eficiencia enerxética.

Terceiro.- Que as entidades asinantes, están interesadas en colaborar na elaboración da documentación técnica necesaria para levar a cabo as licitacións necesarias para a execución do proxecto do Ecobarrio de A ponte no Concello de Ourense, dito proxecto comprende diversas liñas de actuación en materia de eficiencia enerxética e sustentabilidade ambiental a levar a cabo no barrio de A Ponte no Concello de Ourense.

CLÁUSULAS

Primeira.- ALCANCE

A actividade conveniada comprende a realización dos traballos de elaboración da documentación técnica necesaria para levar a cabo as licitacións do proxecto do Ecobarrio de A Ponte no Concello de Ourense, no que se pretende a realización dun proxecto integral de referencia a nivel europeo relacionado ca eficiencia enerxética, un maior uso e aproveitamento de fontes de enerxías renovables e descarbonización a nivel de barrio, que supoña unha drástica redución das emisións de gases de efecto invernadoiro xeradas pola actividade propia do barrio.

O alcance das actuacións que se pretenden son o resultado do anteproxecto elaborado a través do Convenio de Colaboración asinado o 21 de xuño de 2017 entre o Inega e EnergyLab, por competencias nas actuacións a levar a cabo ou por ser titulares de edificios e infraestruturas incluídas nas actuacións do proxecto (Ministerio de Fomento, Xunta de Galicia, Instituto Enerxético de Galicia (Inega), Concello de Ourense, Administrador de Infraestructuras Ferroviarias (ADIF-Alta Velocidad).

Segunda.- OBXECTO

O presente convenio ten por obxecto a elaboración dos traballos seguintes:

- **Edificios públicos:**
 - Realización de auditorías enerxéticas de detalle en 18 edificios públicos e 13 AAVV.
 - Elaboración de pregos técnicos tendo en conta un modelo ESE.
- **Edificios privados:**
 - Realización de auditorías enerxéticas de detalle en 18 edificios privados.
 - Reunións informativas cas CCVV.
 - Elaboración de pregos técnicos para as CCVV tendo en conta un modelo ESE.
- **District Heating xeotérmico:**
 - Estudo de detalle dos requirimentos dos edificios privados e públicos do barrio de A Ponte para a súa conexión o DH.
 - Estudos de potencial aproveitamento da enerxía xeotérmica e combinación con outras EERR.
 - Dimensionamento do sistema, concreción da ubicación da central de xeración e especificación do trazado definitivo.
 - Elaboración de pregos técnicos tendo en conta un modelo de concesión.
- **Iluminación pública exterior:**
 - Traballos de campo para a actualización dos estudos existentes de auditoría de iluminación pública exterior do barrio de A Ponte, incluíndo todos e cada un dos puntos de luz e centros de mando (inventario, medicións lumínicas e medición de consumos enerxéticos).
 - Elaboración de pregos técnicos tendo en conta un modelo ESE.
- **Mobilidade sostible:**
 - Realización dunha auditoría enerxética de detalle da frota de vehículos do Concello.
 - Elaboración de pregos técnicos.

Terceira.- APORTACIÓNS DAS PARTES

Correspóndelle a EnergyLab:

A realización de toda a documentación técnica para dar cumprimento o obxecto do convenio.

Correspóndelle ao Inega :

Achegar a EnergyLab a cantidade de trescentos mil euros (300.000,00 €) (IVE incluído) como compensación polos gastos que lle ocasiona a esta a realización do obxecto do convenio.

A dita cantidade supón o 60 % do custo total da actividade obxecto do convenio (500.000,00 €), actividade que non lle supoñen ningún lucro á entidade EnergyLab, pola súa condición de Fundación de carácter privado sen ánimo de lucro, que ten como misión desenvolver e difundir tecnoloxías, produtos e hábitos de consumo que optimicen a eficiencia e a sostenibilidade enerxética, e como actividade fundacional a colaboración ca administración en temas relacionados con aforro e eficiencia enerxética.

O Inega asumirá tamén as tarefas de coordinación/organización das reunións, asembleas, etc., cos distintos titulares dos edificios e infraestruturas sobre as que se desenvolverá o proxecto, así como xestionar o acceso as instalacións de titularidade autonómica, para poder dispoñer de toda a información que se precise e facilitar os datos dos que dispoña das mesmas (planos, consumos de enerxía, etc.), para a elaboración da documentación obxecto deste convenio.

Cuarta.- ORZAMENTO-FINANCIACIÓN

O Inega aportará trescentos mil euros (300.000,00 €) (IVE incluído), existindo dispoñibilidade orzamentaria na aplicación 09 A2 733A 641.4 código proxecto 201600010, dos orzamentos do Inega para o ano 2018.

Quinta.- XUSTIFICACIÓN DO PAGAMENTO

O Inega, aboará a contía fixada na cláusula cuarta, contra presentación por parte de EnergyLab da factura correspondente, certificacións de estar ao día no pagamento coa AEAT, a Seguridade Social e Facenda autonómica (ATRIGA), e trala conformidade o Inega do cumprimento das obrigas, do seguinte xeito:

1. Unha primeira achega de 120.000 € (IVE incluído) correspondente ao 40%, unha vez executado o 40% do obxecto do convenio, previa xustificación das actuacións realizadas e a súa comprobación polo persoal do Inega.
2. Unha segunda achega de 105.000 € (IVE incluído), correspondente ao 35%, unha vez executado o 75% do obxecto do convenio, previa xustificación das actuacións realizadas e a súa comprobación polo persoal do Inega.
3. A cantidade 75.000 € (IVE incluído) correspondente ao 25%, a finalización dos traballos, previa xustificación das actuacións realizadas e a súa comprobación polo persoal do Inega, no que deberá presentar a seguinte documentación:

- Un exemplar en soporte dixital, deberánse entregar todos os documentos, nun formato que poida ser facilmente modificable por parte do Inega (exemplo: documentos de texto en formato “.doc “ ou similar, follas de cálculo en formato “.xls” ou similar, planos en formato “.dwg”, “.shp” ou similar, ...).
- Un certificado asinado pola persoa responsable onde se exprese que por parte da sociedade se realizou a totalidade do obxecto do convenio.

A factura expedirase a nome do Instituto Enerxético de Galicia (Inega) (NIF: Q1500256A), e presentarase, preferentemente, en formato electrónico a través do sistema electrónico de facturación da Xunta de Galicia regulado na Orde do 26 de febreiro de 2015 pola que se regulan o Punto xeral de entrada de facturas electrónicas e o Rexistro Contable de Facturas da Comunidade Autónoma de Galicia (DOG nº 50, do 13/03/2015). O acceso ao sistema de facturación electrónica e á información sobre él realizarase a través das seguintes URL: <http://conselleriadefacenda.es/factura> ou <http://www.conselleriadefacenda.es/sicon/>.

En todo caso, o Inega resérvase o dereito de solicitar toda a documentación que se considere precisa en relación coa realización das actuacións obxecto do convenio e calquera outra que considere oportuna para a correcta xustificación do gasto e do seu pagamento.

Sesta.- COMISIÓN DE SEGUIMIENTO

Para os efectos de coordinación, información e seguimento a que desen lugar as actuacións proxectadas, así como tamén para a interpretación e resolución de controversias que se puideran producir en base a este convenio, constituirase unha Comisión de Seguimento, cun representante designado por cada unha das partes asinantes.

Esta Comisión reunirse as veces que sexa preciso, sen datas definidas, ata a finalización do convenio.

Sétima.- INEXISTENCIA DE RELACIÓN LABORAL

A subscripción deste convenio non supón ningunha relación laboral contractual ou de calquera outro tipo entre os profesionais de EnergyLab que vaian a desenvolver as actividades e o Inega, de tal xeito que non se lle pode esixir á entidade pública ningunha responsabilidade polos actos ou feitos acontecidos no seu desenvolvemento.

Oitava.- PROPIEDAD INTELECTUAL E MATERIAL

A propiedade da documentación e información obtida como consecuencia do desenvolvemento das cláusulas que rexen este convenio, será de titularidade compartida entre o Inega e EnergyLab, e ningunha das partes poderá difundir, divulgar ou publicar a dita documentación e información sen consentimento expreso das outras partes.

A propiedade e utilización científica dos datos e dos resultados finais da investigación serán exercidas conxuntamente polos asinantes, que se comprometen a intercambiar o material científico e os coñecementos obtidos así como a publicar conxuntamente os resultados.

A información obtida como consecuencias das actuacións obxecto do presente convenio poderá ser utilizada polas partes, as cales se comprometen a non cedela a terceiros, ao rigoroso respecto á normativa de protección de datos e a non utilizala con fins comerciais.

Novena.- VIXENCIA

A vixencia do Convenio será desde a súa sinatura e ata o 31/12/2018, sen posibilidade de prórroga.

Décima.- RESOLUCION DO CONVENIO

O presente convenio poderá ser resolto,

- a) Por acordo mutuo das partes.
- b) Imposibilidade sobrevida de cumprir o obxecto do Convenio.
- c) Incumprimento por algunha das partes do disposto nas cláusulas do mesmo

Décimo primeira. PROTECCIÓN DE DATOS

As partes están obrigadas a cumprir co Regulamento (UE) 2016/679 do Parlamento Europeo e do Consello, do 27 de abril de 2016, relativo a protección das persoas físicas, no que respecta ao tratamento de datos persoais e a libre circulación de estes datos e polo que se derroga a Directiva 95/46/CE (Regulamento xeral de protección de datos, DOUE del 4 de maio).

A tal efecto as partes comprométense a non utilizar tales datos de carácter persoal con finalidade distinta á da execución do presente acordo, a non cedelos nin comunicalos baixo ningún concepto a terceiras persoas nin para a súa conservación, e en especial a non reproducir, publicar ou difundir ningunha información acerca deles.

Cada parte responderá dos incumprimentos da normativa de protección de datos de carácter persoal nos que incorra.

Os titulares dos datos poderán exercer os dereitos de acceso, rectificación, cancelación e oposición, dirixíndose por escrito ao Instituto Enerxético de Galicia, con enderezo na rúa Avelino Pousa Antelo, 5 CP 15707, Santiago de Compostela, A Coruña.

Cando o cumprimento do obxecto do presente convenio de colaboración, faga necesario que as partes se comuniquen datos de carácter persoal de terceiros, aquelas deberán obter previamente o consentimento do interesado.

Décimo segunda.- PUBLICIDADE

En canto á publicidade, procederase de conformidade co mandato da Lei 1/2016, do 18 de xaneiro, de transparencia e bo goberno, no Decreto 126/2006, do 20 de xullo, polo que se regula o Rexistro de Convenios da Xunta de Galicia e no Decreto 132/2006 do 27 de xullo, de creación dos rexistros de axudas, subvencións e convenios, e de sancións da Xunta de Galicia.

En virtude do disposto no parágrafo anterior EnergyLab consinte expresamente a inclusión e publicidade no devandito rexistro dos datos relevantes referidos ao convenio.

Décimo terceira.- NATURALEZA E RÉXIME XURÍDICO.

O presente convenio ten natureza administrativa, quedando fora do ámbito de aplicación da Lei 9/2017, do 8 de novembro, de Contratos do Sector Público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, de 26 de febreiro de 2014; sen prexuízo da aplicación dos principios e criterios da devandita Lei para resolver as dúbidas ou lagoas que puidesen presentar.

O presente convenio rexerá polas súas cláusulas e polo Acordo do Consello da Xunta do 27 de marzo de 1991, publicado por Resolución da Consellería de Economía e Facenda do 8 de abril de 1991, sobre convenios de colaboración con outros entes públicos e con particulares; polas disposicións que en materia de convenios se recollen na Lei 1/2016, do 18 de xaneiro, de transparencia e bo goberno.

En proba de conformidade, asinase polas partes, por triplicado exemplar, no lugar e data indicados no encabezamento.

O Director do Inega,

O Director Xeral de EnergyLab
